

հրդեհների հաւատարմութիւնը, աստղաբաշխահան տիեզերքը: Ա՛հ, ինչպէս չնախանձէի Սիւկիլոյ նոճիզարդ այն փեղերին, ուր մարդկային հոգին առաջին անգամ թեւեր առաւ եւ ճախրեց: Ճախրեց, մինչ այլքները ովկիաններէ վրայ կանգ առին, ամպերը աստղերի շուրջը շղարչ մանեցին, անհունը սրափեց ու երաժշտութիւնը՝ թւերի մէջ ներդաշնակուած տիեզերքը՝ խաղաղ ու պարզ սպրուսի վերածեց:

Անծանօթը խօսում էր յուզուած շեշտով, ներշնչուած ու մի քիչ ջղային: Մարած ծխախոտը մատերի մէջ դողում էր, աչքերը անբնական կերպով փայլում էին, եւ գլուխը անհանգիստ շարժւում էր:

— Չկայ աւելի սրտածմբիկ մի բան, — շարունակեց մարդը, — քան աստուածների մահը: Աստուածների մահը... Սօսքս այն անաւոր ողբերգութիւնների մասին չէ, որոնք տեղի են ունենում Ողիմպոսի կատարին աստուածների մէջ: Այնտեղ, անասելի տառապանքները, սպանութիւնները, ոճիրները հրականների աշխարհին են պատկանում, մեծղի են եւ մեր դատողութիւնից դուրս: Ես խօսում եմ այն մահերի մասին, որոնք տեղի են ունենում մարդկային հոգիների մէջ — ցամքած հորերի այն տիղմը, որ կլանում է ամէն մի վեհութիւն...

— Ո՛ւր է Պղատոնեան Իդէաների աշխարհը. ո՛ւր է Դեմիուրքը, որի մէջ պարփակուած են բոլոր ձեւերը, ո՛ւր է Ակադեմոսի պայծառ երկինքը, Թիրեանեան ծովի խոր լազուրը, ո՛ւր է Ապոլոնեան քնարի լարերով սրափող հոյակապ այն տիեզերքը: Ես ձեզ հարցնում եմ, ո՛ւր է այդ ամէնը...

— Սոկրատը ժպտում է: Արիստոտելյանը զետեղում է նրան բարձրաբարձր անդրաշխարհում ու այլեւս այդ մասին չի խօսում: Յանձնում է ամպերի արիսիվին եւ զբաղւում է ուրիշ գործով: Եւ այն օրից ի վեր տիղմը շարժւում է եւ մարդիկ շրջած շրթունքներով աստուածային զովութիւն են փնտռում: Հրեաստանի թշուառութիւնից դուրս է դալիս մի նոր աստուած եւ լուսաւոր աչքերով նայում է աշխարհին: Նրան խաչում են: Մարդիկ՝ խաչաձեւ փայտերի վրայ նրան սպանում են եւ,

սպանելուց յետոյ, նրա մի կաթիլ արիւնի առջեւ, նրա մի կտոր մարմնի առջեւ, ծնկաչոք երկրպագում են:

— Կրօնական ժողովներ, վիճարանութիւններ, պատերազմ, կողոպուտ նրա գերեզմանի շուրջը: Աւգոստինոս, Լիւթեր, Սպինոզա, Կանտ, Ֆիխտէ... Հասկանո՞ւմ էք, տեսնո՞ւմ էք, աստուածների պարը վիթխարի բեմի վրայ. լսո՞ւմ էք դարերի խորից հնչող բազմազան ձայները. փողերը հեծկլտում են բարձր լեռների վրայ, ու անտառները խարչափում են. հորիզոնի կատարին սպառնացող ամպեր են կուտակուում, անաւոր ոռնումով շանթահար վայր են գլորւում, մինչ ժողովուրդները սարսափած քարայրների մէջ սպասում են: Սպասում են աստուածների մահին ու, երբ նրանք մեռնում են, մարդիկ խնձրեցած վազում են՝ ձուլի բերանից, այլքների վրայ տատանուող խիտնջից, ախտի միջից ծնուող նոր աստուածներին երկրպագելու:

— Մարդիկ, բարեկամ, մեծ աստուածաբաններ են, ու հէնց այդ պատճառով պատրաստ են ընդունելու նոր դոհեր: Մեր գիւղացիները, սրբատեղի դնալու ժամանակ, շոյում, գուրգուրում են այն ոչխարին կամ եղին, որին պիտի մատաղ անեն: Ահա՛ ինչու ես կարծում եմ, որ Լենինը աստուած է... Ամենասաւաւոր աստուածներից մէկը, որ երբեք մարդկութիւնը տեսել է: Սողնիսող մի աստուած, ծընուած քաղաքի գործարանի մէջ, երկաթէ մեքենայի մօտ, երեկոյեան սուլոցի հետ միասին, երբ հնոցը դեռ շարունակում է ապրել:

— Մտածեցէք, մտածեցէ՛ք, ի՛նչ անկում... Փիթագորեան ոսկէ թիւերը, որոնք կառուցել էին տիեզերական ներդաշնակութիւնը, իջել են հաշուապահական տեսարանների մէջ եւ ստամոքսների ելք ու մուտքն են հաչում: Վիճակագրութիւնը — մոզական բառ, որի շուրջը ժողովուրդները կոտորում են, գիւղերը եւ քաղաքները այրւում, երկրները ոչնչանում... Լենինը, հաշուապահական թիւերի պաղարիւն եւ անողոք աստուածը, մեքենաների Մովսէսը, ջրանցքների եւ երկտրականացման առաքեալը: Սլուրդը, Վօլքերի հսկայ խլուրդը...

Անսպասելի այդ հիւրս բնականոն վիճա-